

Hakeem y Jourdé di Brazil Taekwondo Stichting a gana Oro na Santo Domingo



ORANJESTAD - Brazil Taekwondo Stichting su dos atletanan di e team a gana Oro na e Open di Santo Domingo. Diadomingo e hoben atletanan di Aruba cu a biaha pa Santo Domingo diahuebs mainta a subi e arena di pelea. E prome atleta pa representa Aruba tabata Hakeem Lowe cu a bringa den e categoria di -37 kilo di Cadet cu ta entre 12-14 aña. Hakeem Lowe su prome pelea a bay

contra di Santo Domingo na unda cu Hakeem Lowe a gana esaki 9-2.

Den final Hakeem Lowe a topa cu Panama na unda cu e la gana esaki cu un score di 9-3. Aki ta na unda cu e delegacion di Aruba cu ta na Santo Domingo a bira contento, specialmente e presidente di Aruba Taekwondo Asociacion (ARTBO) kende tabata presente pa mira tur

pelea di e team di Aruba y esaki a bira Aruba su prome medaya di Oro.

Jourdé Klabér kende tabata e segundo atleta di e team no a logra haya atleta pe bringa cun'e den su categoria di -59 kilo. Clifford Rasmijn a logra di registra Jourdé Klabér den un pool mas halto pa asina e por a bringa. Asina Jourdé Klabér a cay den un pool di 3 atleta na unda cu e prome pelea Jourdé Klabér a haya un

bye y asina a yega final wardando su contrincante di Santo Domingo na unda cu Jourdé Klabér a gana esaki 8-3 terminando ganado y asina Jourdé Klabér a logra Aruba su di dos medaya di Oro.

Clifford Rasmijn kende a coach ambos atleta a haci un bon trabou pa Aruba. Sra. Marilu de Veer presidente di ARTBO a felicita y gradici e atletanan pa nan bon trabou sacando cara di Aruba un

biaha mas. Asvor lo manda e atletanan pa Mexico den vakantie pa un campamento y competencia di Taekwondo. Na luna di mei e atletanan ta bay Spaña pa participa na e Open di Spaña. Pa Hakeem Lowe esaki ta un campeonato hopi importante, mirando cu e campeonato mundial ta na luna di juli na Azerbaijan y Hakeem Lowe mester ta bon prepara pa asina bin bek Aruba cu medaya di Oro. □

Brazil Taekwondo Stichting a bay aeropuerto pa ricibi Hakeem y Jourdé



ORANJESTAD - Hakeem Lowe y Jourdé Klabér a yega for di Santo Domingo cu nan medaya di Oro. E dos atletanan a wordo presenta pa Marilu de Veer presidente di Aruba Taekwondo Association (ARTBO). Clifford Rasmijn kende a coach Hakeem Lowe y Jourdé Klabér a splica con tur cos a bay na Santo Domingo y con leu Brazil Taekwondo ta den nan preparacion nan. Clifford Rasmijn a bisa tambe cu por spera mas di Brazil Taekwondo su atletanan di . Esaki ta e comienso di Hakeem



Lowe, mirando cu ainda e caminda ta largo. E resultado di dos Oro no kiermen cu nan ta completo ainda, paso ta falta hopi mas pa yega na e metanan. E echo ta cu e atletanan ta train duro y Brazil Taekwondo Stichting kier yega leu cu atletanan cu ta wordo considera e team elite. Marilu de Veer tambe a splica e atletanan presente y tambe Tele Aruba kende a bin comparti e celebracion chikito cu tabata tin di e team di Brazil Taekwondo Stichting. Tur e atletanan cu a caba di train a bay pa ricibi Hakeem Lowe y Jourdé Klabér y a yama nan bon bini. □